

Ministerio di Cultura

Aruba a perde un baluarte di cultura, Sr. Hubert Lio Booi


ORANJESTAD(AAN)-- Den transcurso di fin di siman Ministerio di Cultura a ricibi e tristo noticia cu Sr. Hubert O. (Lio) Booi a fayece, na un edad di 95 aña.

Sr. Hubert Booi naci na Boneiro, a bandona su isla natal pa a permanece na Aruba hunto cu su mayornan.

Lio tabata un persona reconocida pa e pueblo Arubiano y Boneriano.

Lio Booi tabata un persona autoritario y hopi significativo den e sector cultural di Aruba, unda el a ocupa diferente funcion den e aparato publico.

Sr. Lio Booi tabata conoci como un artista riba tur nivel, lagando un legado como poeta, pintor, escritor y sin lubida



musico atras.

Su aporte tabata grandi pa nos himno "Aruba dushi tera", unda el a colabora cu e di tres couplet cu su inspiracion: "Grandesa di bo pueblo ta su gran cor-

dialidad. Cu Dios por guia y conserva su amor pa libertad."

Lio Booi tabatin tambe diferente publicacion literario na su nomber, manera "Golgotha" publica na 1967 den "Antilliaanse Cahiers", "Muchila" publica na 1969 y "E Flamingo di Aruba" publica na 2006. Y ken no ta corda e exito grandi di su obranan musical "E perla di Caribe" di 1955 y "Amor di Kibaima" di 1969.

E tabata traha como empleado di banco y como boekhouder, pa despues bira hefe suplente di Oficina di Turismo y Arubaanse Voorlichtingsdienst. Na

1963 Lio a bira Hefe di Oficina di Cultura y Educacion y for di 1978 te ora el a bay cu pension na 1980 el a traha como Hefe di Instituto di Cultura. Den e posicionnan ey Lio a crece bira promotor importante di e bida cultural riba nos isla, caminda el a hunga comedia tambe y e tabata skirbi obra teatral, poesia y storia.

E tabata sigur un baluarte den cultura cu te cu na e ultimo dianan a keda activo, unda apesar di su dificultadnan cu bista el a keda activo den e area cultural unda el a toca piano, pinta y compone te na final.

Ministerio di Cultura ta expresa palabranan di condolencia na e yiunan, famia, amigonan, comunidad Boneriano y henter Aruba cu fayecimento di Sr. Hubert O. (Lio) Booi. Cu Lio sosega na paz.